



## I. ERANSKINA

### **OGASUN, FINANTZA ETA AURREKONTUEN SAILAK ARABAKO LURRALDE HISTORIKOAN JAIOTZA-TASA SUSTATZERI BEGIRAKO DIRU-LAGUNTZAK LEHIA ASKEKO ARAUBIDEAN ESLEITZEKO OINARRI ARAUTZAILE OROKORRAK.**

Arabako Batzar Nagusiek, 2019ko urtarrilaren 16ko bileran, Pertsona Fisikoen Errentaren gaineko Zergari buruzko 33/2013 Foru Araua aldatzen duen urtarrilaren 16ko 1/2019 Foru Araua onetsi zuten, seme-alabak jaiotzeagatiko zuzeneko diru-laguntzen lerroa ezartzeko xedez.

#### **1. artikulua. Xedea eta aplikazio-eremua.**

Foru-dekretu honen bidez, Arabako Foru Aldundiaren Ogasun, Finantza eta Aurrekontuen Sailak Arabako lurralde historikoan jaiotza-tasa sustatzeari begira lehia askeko araubidean esleitzen dituen diru-laguntzen oinarri arautzaile orokorrak ezartzen dira, Arabako lurralde historikoan bizi diren familia-unitateetako zergadunei seme-alabak edukitzeagatik esleituko zaizkien laguntza zuzenei dagokienez.

#### **2. artikulua. Printzipio orokorrak.**

Ematen diren diru-laguntzak ondoko printzipio hauen arabera kudeatuko dira:

- Publikotasuna, gardentasuna, norgehiagoka, objektibitatea, berdintasuna eta bereizkeriarik eza.
- Eraginkortasuna ezarritako helburuak betetzeko.
- Baliabideak esleitzeko eta erabiltzeko efizientzia.

#### **3. artikulua. Kontzeptuak.**

1.- Familia-unitate batean 2019ko urtarrilaren 1etik deialdian zehazten den egunera bitartean jaiotzen diren seme-alabengatik eman ahalko da diru-laguntza.

2.- Pertsona Fisikoen Errentaren gaineko Zergari buruzko azaroaren 27ko 33/213 Foru Arauaren 98. artikuluan zehazten den familia-unitatea hartuko da aintzat.

Familia-unitateko kideak zehazteko datari dagokionez, oinarri hauen 5.4. artikuluan ezarritakoari helduko zaio.

3.- Urteko diru-sarrera gordintzat hartuko dira familia-unitateko kideek jasotzen dituzten errentak. Ondorio horietarako, azaroaren 27ko 33/2013 Foru Arauaren 6. artikuluan zehazten den errenta-kontzeptua hartuko da kontuan.

Diru-sarrera gordinen artean zenbatuko dira Pertsona Fisikoen Errentaren gaineko Zergatik salbuetsita dauden errentak.

Urteko diru-sarrera gordinak zehazteko, sortutako azken zerga-ekitaldia hartuko da aintzat.



#### **4. artikulua. Deialdia.**

Oinarri hauek onartu ondoren onetsiko da ekitaldi bakoitzari dagokion deialdia.

Oinarri hauetan xedatzen ez den guztian, deialdiak Arabako Lurralde Historikoko Diru-laguntzei buruzko urriaren 19ko 11/2016 Foru Arauari helduko dio.

#### **5. artikulua. Onuradunen betekizunak.**

1.- Familia-unitateko aita edo ama izan ahalko da laguntzen onuraduna, deialdian diru-laguntza eskatzearen inguruan zehazten diren baldintzetan.

2.- Familia-unitateak benetan bizi beharko du Arabako lurralde historikoan, eta bertako edozein udalerritan errolatuta egon beharko du, laguntza honen xede den jaiotza gertatu baino urtebete lehenagotik gutxienez, Pertsona Fisikoen Errentaren gaineko Zergari buruzko azaroaren 27ko 33/2013 Foru Arauaren 2. eta 3. artikuluetan ezartzen dena bazter utzi gabe.

3.- Laguntza emateko, jaiotzaren eguneko familia-eraketa hartuko da aintzat.

4.- Onuradunak ezingo dira egon Arabako Lurralde Historikoko Diru-laguntzei buruzko urriaren 19ko 11/2016 Foru Arauan eta Emakumeen eta Gizonen Berdintasunerako otsailaren 18ko 4/2005 Legearen 3.1.c) artikuluan onuradun izateko jasotzen diren debekuetan sartuta.

5.- Onuradunak egunean eduki beharko ditu zerga-betebeharrak eta Gizarte Segurantzaren aurreko betebeharrak.

#### **6. artikulua. Laguntzak esleitzeko araubidea.**

Oinarri hauetan arautzen diren laguntzak lehia askeko araubidean esleituko dira, eta eskaerak jaso ahala banatuko dira funtsak; beti ere, oinarri hauetan ezartzen diren betekizunak betetzen badira, dagokion deialdian onesten den aurrekontu-horniduraren mugarekin.

#### **7. artikulua. Diru-laguntzen gehieneko kopuru osoa eta zenbateko indibidualizatua.**

1. Deialdiak finkatuko du diru-laguntzei zein zenbateko bideratuko zaien, zein aurrekontu-partidari helduko zaion eta, hala badagokio, zenbateko gehigarria zein izango den.

2. Onuradun bakoitzari seme-alabak jaiotzeagatik esleitu ahalko zaion diru-laguntzaren zenbatekoa honako hau da:

- Familia-unitateak urtean 40.000,00 eurotik beherako diru-sarrera gordinak badauzka, laguntza 1.000,00 eurokoa izango da jaiotza bakoitzeko.
- Familia-unitateak urtean 40.000,00 euroko edo hortik gorako eta 75.000,00 eurotik beherako diru-sarrera gordinak badauzka, laguntza 500,00 eurokoa izango da jaiotza bakoitzeko.
- Familia-unitateak urtean 75.000,00 euroko edo hortik gorako diru-sarrera gordinak badauzka, laguntza 250,00 eurokoa izango da jaiotza bakoitzeko.



## **8. artikulua. Prozedura bideratzeko eta ebazteko eskudun organoa eta ebazpena jakinarazteko epea.**

1. Deialdian ezarriko dira prozedura bideratzeko eta ebazteko organo eskudunak.
- 2.- Organo izapidetzaileak, espedientea ikusita, ebazpen-proposamena egingo du, behar bezala arrazoitua.
- 3.- Organo izapidetzaileak proposatuta ebazpena emateko eskumena duen organoak deialdian xedatzen den epearen barruan emango du egokitzen den ebazpena. Ebazpen horretan, diru-laguntza esleitzen zaien eskatzaileen zerrenda eta diru-laguntzaren zenbatekoa jasotzeaz gain, berariaz ezetsiko dira gainerako eskaerak, ezesteko arrazoia jasoz.
4. Diru-laguntza esleitzeko edo ezesteko ebazpena eskatzaileei banaka jakinaraziko zaie, Administrazio Publikoen administrazio-prozedura erkidean aurreikusten denarekin bat.
5. Laguntza esleitzeko edo ezesteko ebazpenaren kontra, indarreko legediaren arabeko errekurtsioak jarri ahalko dira.

## **9. artikulua. Eskabideak nola aurkeztu eta horretarako epea.**

Eskabideak dagokion deialdian zehazten diren ereduarekin eta epearekin bat eginez aurkeztuko dira.

## **10. artikulua. Diru-laguntza ordaintzea.**

1. Diru-laguntza ordainketa bakarrean abonatu da, dagokion deialdian bestelako ordainketa-moduren bat ezarri ezean.
2. Onuradunak zerga-betebeharrak eta Gizarte Segurantzaren aurreko betebeharrak egunean ez badauzka, diru-laguntza ez da ordainduko.

## **11. artikulua. Diru-laguntzen aldiberekotasuna eta bateragarritasuna.**

Laguntza hauek bateragarriak dira edozein administrazio edota erakunde publiko zein pribatuk esleitutako diru-laguntzekin.

## **12. artikulua. Diru-laguntza itzultzea.**

Esleitutako diru-laguntzak itzuli egin beharko dira Arabako Lurralde Historikoko Diru-laguntzei buruzko urriaren 19ko 11/2016 Foru Arauaren II. tituluak ezarritako kasuetan.

Onetsitako diru-laguntzarekin jasotako kopuruen itzulketa zuzenbide publikoko diru-sarreretat hartuko da, eta Ekonomiaren eta Aurrekontuen Araubideari buruzko abenduaren 18ko 53/92 Foru Arauan aurreikusten denaren arabera kobratuko da.

## **13. artikulua. Egiaztapena.**

Organo izapidetzaileak deialdiak garatzeko egokitzen dituen jarduerak egiteko ahala dauka, baita onuradunek emandako datuak egiaztatzea eskatzekoa eta datuon egiazkotasuna egiaztatzekoa



ere, oinarri hauetan arautzen dena betetzeko. Ondorioz, onuradunek laguntza hauekin zerikusia daukaten datu eta dokumentu guztiak eman beharko dizkiote organo izapidetzaileari. Era berean, Arabako Foru Aldundiak, Kontu Publikoen Euskal Auzitegiak edo bestelako erakunde eskudunek eska dezaketen informazio guztia eman beharko dute.

**14. artikulua. Aplikatu beharreko arautegia.**

Oinarri hauetan ezartzen ez den guztian, Arabako Lurralde Historikoko Diru-laguntzei buruzko urriaren 19ko 11/2016 Foru Arauan, Arabako Lurralde Historikoko Aurrekontuen Araubide Ekonomikoari buruzko abenduaren 18ko 53/1992 Foru Arauan eta Administrazio Publikoen Administrazio Prozedura Erkideari buruzko urriaren 1eko 39/2015 Legean xedatzen denari helduko zaio.

**15. artikulua. Indarrean jartzea.**

Oinarri hauek ALHAOn argitaratu eta hurrengo egunean jarriko dira indarrean.